


# Génesis 3



Tusa tima Adán niina nuwe daajin  
adaikauwai Eva: Nii ashí aentsun  
dukuji atin asamtai.




Apajuí ashí kuintin tagkumchatai  
aidaun najankauwa nuwiya, dapi ima  
senchi kajinkachu, tsanumtan yacha  
asa, nuwan tajua iniak: "¿Apajuísh  
wajinjutpagmae, juju yujág aina  
duka makichkish yuwawaigpajum  
tujamiagmaka?" tau.



Tama nuwa ayaak:

"Yujagkek ashí yumainaitji. Untsu Apajuí iina chichagtamak, tikich yujág ejapeen waja auna nejeg yuwawaigpa, antiitkesh antigkaigpa, auna neje yuwakjumek jakattajume, tusa tujamaji" tau.



3

Tutai dapi nuwan

chichajak: "Auk wainak tujamne, jakashtatjume. Apajuí shiig dekawai, au yujág yuwakjume, atum wajukua ainagme nunú wainmamkajum Apajuíjai betek wajasjum, pegkeg, pegkegchaujai dekamainaitjum nuadui aunak tujabiugme", tiuwai.




4

Tama nuwa yujagken diistakama shiig senchi wakejukui. Nuniak dekas yuwatjai, nunikan Apajuí wainbau yacha iman atajai tusa, akaka juki yuwauwai. Nunik aishinashkam susam, niishkam juki yuwauwai.



5

Nuna yuwawag wajanbauwaik, mai wisu wajamun wainmamkajui, nunikag makichik ajak higuera tutaya nuna dukeen apajag itipjuawajui.



6



Tujash Apajuí aishmagkun untsuka iniak: "éTuwi amesh pujame?" tau. Tama nii ayaak: "Wika ame minamun antukan ishamkajame, núnikan wisu pujau asan uumjukjame", tau.

7



Tutai Apajuí aishmagkun chichajak: "éYa ame wisu pujamunash dekamtijamame? éWagka wi amina yujág yuwawaipa timajam dusha yuwamume?"

8

Tama aishmag Apajuín ayaak: "Ame wijai tsaniasa pujusa yainikti tusam nuwa sujusmaum nunú yujagken sujusmatai, wika yuwamjai" tau. Tutai Apajuí nuwan iniak: "¿Amesh wagka dutikamume?" Tama nuwa ayaak: "Minak dapi tsanujamtai, yujagken yuwamjai", tiuwai.




9

Nuadui Apajuí aentsun Edégnum pujaun jiiki juki yamaik nugka najanamua juwi takasa yuwa pujustinme tusa apusauwai.




10

Dutika jiiki ajapeak, Apajuí niina aentsjin querubin aidaun etsa minitaiya aatuni awaantauwai. Dutikak yujág pujuta sukagtina nuna waya yuwawainum tusa puyag kegaun apujtusui. Nunú Edégkan tentea apajakui.



11

Adánka nuwe Eva ejapjukui, nunik pujus tsawanji jegajim aishmagkun uchigmakui, nunik adaikauwai Caín. Nunak: "Makichik uchin aishmagkun uchigmakjai, junak Apajuí minak sujuse", taku tiuwai.



12

Duwi pujus Eva tikichin uchin Abelan Caígka yachin uchigmakui. Abelak uwijan kuitamajakui, untsu Caín ajakan ajakbau aajakui.




13

Kuashat tsawan nagkaemakui ai, makichik tsawantai, Caín Apajuí anentag susatnun ajaka nejen juuka juki ejentauwai. Tuja Abelchakam makichik uwig yama nagkamchak petsakbau shiig duwegman achika juki Apajuín emematak ejetiuwai. . .



14

... Dutikantai Apajuí Abelnak shiig anenjauwai, nuadui Abeldaunak shiig anentus jukiuwai. Untsu Caígnak shiig anenjachui, tuja nii anentag susamunashkam shiig anentsag jujukchauwai. Dutikam Caín senchi kajekui, nunik kajekbautak wekagu.



15

Makichik tsawantai Caín yachin chichajak: "Ajanum wemi" tusa yachin juki weuwai. Nunik atushat akanak yachi Abelan mauwai.




16

Dutika yachin maamtai, Apajuí Caígnak chichajak: "¿Dusha amina yatsum Abelash wajukame?" tusa tama, Caín ayaak: "Achah, wikaitag mina yatsuju kuitamnun", tiuwai. Dutikam nii pujusa Apajuíjai chichasbaunak ukuak Nod nugkanum wee pujusui. Nod nugkak Edégnum wajasa diismak etsa minitaiya nuni aajakui.



17

Adánka nuwe ataktu ejapjuk uchi aishmagkun uchigmakui, dutika adaikauwai Set. Nunak: "Mina uchig Abelan Caín mauwa duwi minak juna Apajuí sujuse", taku tiuwai.



18

Nuna akia pujusui ochocientos mijan, tuja nuigtushkam tikich uchi aishmag aidaun, nuwa aidaujai akigkui. Ashí ijumjamak novecientos treinta mijan pujus jakauwai.



19

Aents aidau nugkanum batsamas senchi tunamainak, ima pegkegchaunak anentaimtus yujajuidaun Apajuí wainkauwai.



20

Nuna tusa Apajuí chichaak: "Ashí aents aidaun wi najanawaitag nunak, aentsnum nagkamsan, kuntinnash, tuja japiinas yujau aina nunash, chigkinash ashí betekmasan ijinatjai. Najanmainchaunas najanawabiagtai,

tusan awake anentaimjai", tiuwai.

21

Tujash Apajuík Noénak ima nigki puyatjusa umigbau asa, shiig anenjauwai. Noé akiauwai kampakum uchiji aishmagkun, duka: Sem, Cam, Jafet aatus aajakui.

22

Wagki Apajuí ashí aentstin senchi anejatu asa, Uchijí makichkiuchia nuna sujamsauwai, ashí niina dekaskeapi tuidauk megkaekashtinme, ayatak pujut nagkanchau ajitnume tau asa.

2

60

23

Romanos 3:23 Ashí aentstik betek tunamaku asaja, Apajuí diismak pegkejak wantinkachuitji.

Romanos 6:23 Tudauk Apajuiyai datumkagtawai; untsu Apajuí anenjauch sujama duka iina Apuji Cristo Jesusjai ijutkau pujamunum pujut tuke atin juwamua nuuwei.

Hebreos 9:27 Tuja nunisag aents aidaushkam makichkia jakati tibau ainawai, nunik dui nagkaemamainai Apajuiyai dekgamamatatus.

Efesios 2:8,9 Wagki atumek dekaskeapi tabauwai wait anenjá uwentikjamu ainagme; nunak atum pegkeg takasbauwai dutikachui, Apajuí nigki anenjauch uwemtanak amasajui, duka ii pegkeg takasbauwai uwemat jukichu asaja, ii emematmamainuk makichkish atsugtamji.

24

Romanos 10:9,10 Ame wenimin chichakam: Jesusak mina Apujui takum, anentaiminish Jesús jakauwa nunash Apajuiyap dekas inankiuwaita takumek uwemjau atatme.

Wagki anentainum dekaskeap nunikuita tabaunum pegkeg ainagme tama ainaji. Tuja, iina wenin chichaká Jesusak mina Apujui tabaunum uwemtak junawai.

Juan 3:16,17 Wagki Apajuí ashí aentstin senchi anejatu asa, Uchijí makichkiuchia nuna sujamsauwai, ashí niina dekaskeapi tuidauk megkaekashtinme, ayatak pujut nagkanchau ajitnume tau asa. Wagki Apajuik Uchijinak ju nugka juig aents aidaun suwimkan susati tusag awemachui, ayatak aents aidau niini uwemtan jukitnume tusa awemauwai.

25

1 Juan 5:11-13 Juuwei etsegtamua duka: Apajuí pujut tuke atinun sujamsamua nu, nunú pujutak niina Uchijin awai.

Apajuí Uchijijai ijutkau pujuidautik, pujut tuke atina nu ajutjamainaji. Untsu Apajuí Uchijijai ijutkau pujuinachuk, pujut tuke atina duka atsujuinawai.

Jujú aina junak Apajuí Uchijiya nu dekaskeapi tuidau asajum, pujut nagkanchau jukiuwaitjum nunú aidautigmin dekaatnume tusan agatjime.

26

Génesis 3 - 6

Storyline by: Edward D. Hughes

Illustrated by: Byron Unger, Lazarus  
and Alastair Paterson

Adapted by: M. Maillot; Tammy S.

Aguaruna Bible (agr) © 2020, Wycliffe Bible  
Translators, Inc.

<https://live.bible.is/bible/AGRTBL/MAT/1>

©2024 Bible for Children, Inc.

[www.M1914.org](http://www.M1914.org) [www.bibleforchildren.org](http://www.bibleforchildren.org)